

Poli'a Korinti

Vahe'mokizmi Anante (2)

Avonkrezami'nea Nanake

1 ¹ Ama avona Poli'na Anumzamo, Kraisi Jisasi aposol eri'za vahe manio huno huhamprinante ne'mo'nane, Timoti nerafu'ene kreneramu'e. Ama ana avona, Korinti mono nagate'ene ana miko Akai (Greece) kaziga Anumzamofomo mono naga'ma mni'narega kreneramu'e. ² Anumzanti nafatimofone, Ranti Kraisi Jisasi asunkuzamo'ene rimpa fruzamo'a tamagra ne mesie.

Hazenkefi ufresageno Anumzamo zmazeri fru hania naneke

³ Rantimofomo Kraisi Jisasi Nefa, Anumzamo Agrake mika asuragi zamofomo agafa'a mani'nenono, tazeri fruma nehimofomo agi erisaga huta musena huntasune. ⁴ Mika knazantifina Agra tazeri fru nehie. E'inahu hu'negu Anumzamo'ma tagri'ma hu'neakna huta rumokizmia knafima mni'nesageta zmazeri fru hanune. ⁵ Na'ankure Jisasi Kraisi'ma, rama'a ataza eri'neankita, tagranena tata anahukna huta enerunanagi, anahukna huno Kraisi rimpa fruzamo'a tagu'afina avinete. ⁶ Tamagri knare zanku'ene tmahoma kezanku'ene, tagrira tazeri havizana hugahaze. Tamagrama fru huta manisagu, Anumzamo'a tagrira tazeri fru nehie. E'i ana zamo'ma eama nehiana, akoheno manineno, tagrama eneruna kna knazama e'nerimofonte efore nehie. ⁷ Ana hu'negu hanave antahintahi nehuta amuhama huramunana, tagrama erisuna tatazampintima, tamagra'enenema erisazana, tamagra anazanke huta Anumzamo'ma fruzama tamisifintira erigahaze.

⁸ Nenfutane nasarehetanena antahigahaze, Esia kaziga kumapina knazampi ufre'nonana, ana kna'zamo'a tazerino arentakro nehuno, tagri hanavea tazeri agateregeta, ana knazana eriga osuta hago nefrumpi huta antahi'none. ⁹ Tamage, tagrama tagu'afima antahunana, trake'mo refko huranteno frigahaze huno hianakna nehune. Hianagi e'inahuzama fore'ma nehiana, tagra hanavegura ontahigahunanki, Anumzamo'ma

fri'nea vahe'ma zmazeri onetia hanavegu antahigahune. ¹⁰Hagi fri kankamupintira tahokeno tavreneankino, ete rune, neravrena tagra amuhara Agriku nehanunkeno Anumzamo'a mago'ane tahokeheno tagu vazigahie. ¹¹Tamagrama nunamu hutma taza hazazamo'ma eama hiana, rama'a vahe'mo'za hu musena hu'naze. Na'ankure tagrima kegva krirantezanku nunamuna hazageno, Anumzamo'a ana nunamuntia antahizmino taza hu'ne.

Poli'a Korinti vahe'mokizmia rezmatga osu'nea naneke

¹²Tagrama musema hunana, tamagra manuna knafina ama' tagutagesama tagu'afima e'nerita, hakareza hu'nazampi mni fatgo nehuta, ruotge huta nemnita, Anumzamofa so'e avu'avazante nemnita, ama mopafi antahizankura nontahize. ¹³Na'ankure avoma kreraminofina, tamagrama nehampritma antahini osuga'zana kreonte'noanki, nagrama antahuana, mikošana amatfa hu'naze. ¹⁴Meninena tagrira antahirami so'e osugahazanagi, Rantimo Jisasi Kraisi esia zupa, tamagra musena tagrikura nehanageta, tagranena anazanke huta tmagrikura musena hugahune.

¹⁵Nagra tamage ko kena antahina huneramina, ese'ma retro hu'noana, tamagritema esu'azamo'a tare asomura erigahaze. ¹⁶Masetoniama enevuna eme tamageme evute'na, ete anantegatima esugeta tamagra naza hanage'na Judia vugahue. ¹⁷Nahigeno enaku'ma retroma hu'neana atreno ome huta nantahigegahaze? Nagrikura antahintahini'a retrora osu'nefi huta hugahaze? Hifi nagra ama mopafi vahe'mo'za i'o hugazanku izo nehu'za, izo hugazanku i'o nehazankna vahere hutma nagrikura nehazo? ¹⁸Hu'neanagi Anumzamo'a Agra'a ke'are oti ne'kina, tagranema neramasamuna nanekemo'a, tamagama huta izo hanuta, izo hugahune. I'oma hanuta, i'o hugahune. ¹⁹Na'ankure, Anumzamofa mofavre Jisasi Kraisi agi agenkema nagrangi, Timotiki, Sailasiki hutama nerasmunana, Jisasi Kraisi, Anumzamofa nemofa'a Agra izoma nehuno'a, i'o osu Ne'mofa agenke huama huta neramasamune. ²⁰Anumzamo'ma mika huvempa kema huntea kemo'a, Jisasimpi avufga'a efore hu'ne. E'i ana hu'negu, Jisasi agima husga huta tmage huta hu'nazamo, Anumzamofona ra agi nemie. ²¹Hagi Agrake Anumzamo, tagri'ene tamagri enena tazeri hanavetino, Kraisimpina huhampritante'ne. ²²Avame'za Avamu'areti tagu'afi anteneranteno Nagri vahere huno hu'ne. Henkama hakare'za tamisiazamofa huvempa hu'ne.

²³Hianagi, Anumzamoke nagri nagu'namena keno antahino hu'ne. Nagra tamage nehuankino Anumzamoke ana tamage keni'a refko hunantegahie. Ana agafare Korinti kumatera mago'ane ome'noe, na'ankure nagra hanave kefinti eme tamazeri fatgo osugahue.

²⁴Hianagi tamagri tamentintimofa kvagrirmante'nakura nosunanki,

magoka tamagrane eriza erisunketa tamagra muse hugahaze. Na'ankre tamentintifina, tamagra oti hanavetigahaze.

2 ¹E'ina hu'nagu nagra henkama tamagri'ma tamage'naku esu'na, amanahukna nasuzampina mago'ane omesue hu'na nagesa nentahue. ²Na'ankure nagrama tamarimpa eri haviza hanenkeno'a, iza nagrira nazeri muse hugahie? Hianagi tamagri'ma, tamarimpa knama eritamumotma nazeri muse hugahaze. ³E'ina hu'negu, amanahukna avona kre neramue. Nagrama esoa knarera, nazeri musema nehaza nagara, zmarimpa kna eri ozamisue. Tamage nagra antahi'noe, tamagra musema hanage'na, nagranena muse hugahue. ⁴Narimpamo'a tusigna nehige'na zavi netena, ama avona kreneramue. Tamarimpa tamazeri kna hunakurompage, nagrama nagu'afima navesineramantoaza antahيامa hnazegu kreneramue.

Vahe'mofo kumi'a atrentezamofonanenke

⁵Mago'mo'ma tamarimpa knazama eritamiana, tamagrama hazaza hu'na nagra rama'a narimpagna hunontoe. Na'ankure anamofona mago'a arimpa kna eriominakure. ⁶Rama'amota anamofona ko mago tamarimpa hunontazageno, anazama hu'nea knazamofonavamente mizama'a e'nerie. ⁷Ru arimpa haviza hu'zamo azeri haviza hanigeno asunkuzampi mani'zankura, kumi'a atrenteteta azeri so'e hiho. ⁸Ana hu'negu nagra huhankaveti'na nehuanki, tamagrama tamavesi'nentaza zana erinte ama hinke'za keho. ⁹Ama avoma kreramua agafa'a, ana miko ke tmasami'noa kemofonamagera nentafi, reramahe'na kenaku kreneramue. ¹⁰Hagi tamagrama mago vahema kumizmi atrezamantesazana, nagranena kumizmia atrenezmantoe. Na'ankure nagra kumizmia atrenezmantoe, [kumima atrezmantegazama menenkena tamage huna atrenezmantoe], Kraisi avurera tamagrama knarema hanagu atrenezamantoe. ¹¹E'inahukna hanuta Sata reravataga hania zampintira evuoramisune. Na'ankure ko Sata raraheno kenaku tro hunte'nea havi antahizama'a, keta antahita hu'none.

Poli'a Taitusi kenaku hu'nea naneke

¹²Nagrama Troasi kumate Kraisi knare musenke huama hunaku uhnatugeno'a, Ramo'a kankamuna erinaginantene. ¹³Hianagi narimpa fru e'ori'noe. Na'ankure nenafu Taetusia tamagri tamagenkea erino ome'neazanku, Troasia atre'na Masedonia nevu'na, hufu huramantoe.

Anumzamofonankavefi Sata agteresanananeke

¹⁴Na'ankure Anumzamofonavurera tagra Kraisina mana nentake zankna huta mani'neta, zamagumavazi'nea vahete ene fnanene hanaza vahetera knare mna viankna nehuta susu hunentone. ¹⁵Kraisine

hagerfi'nonku knare mna nevia kna nehanunkeno, Anumzamo'a muse nehie. Ana naneke vuno eno nehigu mna nentahizankna hu'za maka vahe'mo'za nentahize. Kefoza zimifinti zamahoke nehea vahe'mo'zane kefoza zimifinti zamahoke nohea vahe'mo'zane nentahize. ¹⁶Fananema hanamokizmirera fri hi'mana nevie. Hianagi tasimuma erita manisuna vahe'motarera, asimu erino mani mana vugahie. Hianagi i'za ama ana erizana eriga hu'ne? ¹⁷Mago'amo'za zgo erigahune, nehu'za Anumzamofonaneke huama nehzana, tagria Anumzamo hurantegeta fatgo huta huama nehune. Huama nehunana Kraisi'a tagu'afi nemanigeta Anumzamofonavure huama' nehune.

Anumzamo kasefa huno hagerafi'nea naneke

3 ¹Tagra mago'ane agafa huta tavufga erisaga hunaku nehumpi? Hifi tamagra, tagri tavufa erisagahu avo kreho nehumpi, hifi rumo'za avon kre'za tagri husga hihogu nehune? ²Tamagra'a tagri avona mani'naze. Ko tagu'afi krentenege'za miko vahe'mo'za nehampriza antahiza ke'za nehaze. ³Kraisintegati kretregeno e'nea avontafe kna huta eama nehazageta, tagra kegva nehune. Ana avona avo zotaretira onkre'neanki, kasefa huno mani'nea Anumzamofon Avamuteti krente'ne. Hagi ana avona havere kreonte'neanki, vahe'mofo tumopi krentene.

⁴Ama ana miko zankura Kraisimpina, Anumzamofontetamentinti nehuta hankave e'nerune. ⁵Ana miko zama nehuna zankura, tagra'a hankavere nehune huta osugahune. Hianagi Anumzamo agra'a hankavereti hunerante. ⁶Agra anazanke huno tagrira huranteno hankave tamigeta kasefa hagerafi kea hu'nea zamofon kegva hu'neta erizana e'nerune. Avompima krentenea zankura nosunanki, avamupi zanku nehune. Na'ankure Avompima krente zamo'a zamahe nefrie. Hianagi avamumo'a, zmasimu nezamie.

⁷Hagi, havere erivakakino krentenea avompinti frizana avareno neazamofon erizamo masa'ane ne-e. Hu'negu Israeli vahe'moza, ***zamavuginki hige'za Mosena avugosafina onke'naze, na'ankure masazamo avugosafintira remsa hige'za nonkageno, ana msamo'a akoheno avugosafintira resu hu'ne.*** (Diu-Kas 35) ⁸Hagi Ruotge Avamumofon erizamo'a mago'ane agatereno hanave'ane hihamua omanegosifi? ⁹Na'ankure vahe'mofoma knama nemia erizamofon msa'ane hankave'a me'nenigeno'a, fatgo erizamo'a agetereno ra msa'ane hankave'a megahie. ¹⁰Anumzamofon tusi'a msa'ne hanave'amoma me'neana kasefa erizama Anumzamo'ma erinea zamo, koma Anumzamoma eri'nea erizamofon msa'a agaterene. Ana higeno ko erizamofon msa'mo'a ko vgarene. ¹¹Hanki fanane hunoma nevania zamo'a hankave'a me'nenigeno'a, mago'ane mevava huno vania zamo'a, hankavemo'a agateregahie.

¹² E'ina hu'negu tagra fore'ma hanigu amuha nehuta, kea hankavetita nehune. ¹³ Tagra Mosese knara osu'none, ***agra avugosafi tavravenu refitenegeno, Israeli vahe'moza avugosafi msazamo'ma fnanema hiama'a onke'naze.*** (Diu-Kas 34:33-35) ¹⁴ Hianagi antahintahiza zmimo'a hanavetino antro higeza maniza neazageno, ama knare ehanatine. Na'ankure korapa huhagerafi kasegema nehamprizageno'a, ana tavravemo'a refiteno ne-egeno, Kraisiimpi ana tavravea eritrene. ¹⁵ Hianagi meninena Mosese'ma krente'nea avo hamprizana, ana tavravemo antahintahizamia refite'ne. ¹⁶ Hu'neanagi vahe'mozama Ramofontema zmagu'ama rukrehema hzageno, refimatezmantenea tavravea erinetre. ¹⁷ Ana hu'negu Ramo'a Avamukino, Ramofo Avamuma me'nesirega, kinarente'zana omanegahie. ¹⁸ Hianagi miko tavugosa refi'ote vahe'mota, Ramofo msazama'amo'a tagrite remsa nehigeta, kapomo hiankna huta remsa huta Agri'kna hunkeno, Ramo'a avamukino, agri msazamo'a mago'ane tagripina remsa nehie.

Mopa kavofi knare fenozantmi me'nea zamofa naneke

4 ¹ E'ina hu'negu Anumzamomo'ama asuragi rante'neazamo higeta, tagra ama erizana e'nerune, e'igu tagrira tavesra nosie. ² Hianagi tagra agazegu huno oku'a huga avu'avara nosune, vahe'mokizmi rezmatga huta zmazeri havizahu avu'avazana nosuta, Anumzamomofo kegaga eriruvahe huta vahe'mokizmia rezmatga nosune. Hianagi Anumzamomofo avure ene vahe'mokizmi antahizampina, tagripina tamage'zamo eama hanigeza kegahaze. ³ Tagrama knare musenke huama hunazamo'ma ama'ma nosiana, fananema hanaza vahe'mo'za amara nosaze. ⁴ Ama mopafi havige anumzamomo, Sata'a zamentinti nosaza vahera antahintahizamia refinetege'za, knare musenkemomo msa Kraisina Anumzamomofo amema'a nonkaze. ⁵ Na'ankure tagra'a naneke huama nosunanki, Jisas Kraisi'a Ra mani'negeta, tagra Jisas Kraisinku huta tamagri kazokzo eriza vahe mani'none. ⁶ E'ina hu'negu korapara Anumzamomo huno, hanimpina tavimo'a remsa hino hu'nemomo masamo, tagrite emani'nenno tavi'a taguafina remsa nehigeta, tagra Jisasi Kraisi avugosa negeta, tagra tusi'a msane hanavene ke'noe.

⁷ Hianagi tagra mopa kavogna hunonkeno zgo'amo mareri'nea fenomo agu'afinka me'neakna hu'none. Tamage hankevea tagritegatira nomeanki, Anumzamomofontegati ne-e. ⁸ Hakare kazigati knazamo'a trentarako nehianagi, ana knazamo'a trentarako nosie, antahintahitimo'a savri hianagi tamentintia notrone. ⁹ Knaza tamizanagi, Anumzamomo'a noratre, tahe tatarazanagi, tazeri haviza nosaze. ¹⁰ Tagra mika zupa, tavufgafina Jisasi fri'za erita vano nehunke'za, Jisasi nomani'zana, tagri tavufafi anazanke huno eama hige'za negaze. ¹¹ Na'ankure tasimu'ma erita mani'nomota Jisasi fri'zankuma huama hunazanku, hakare zupa fri

kantera tavrenenteankino, Jisasi nomani'zana, ama amega tavufgare eama hanige'za kegahaze. ¹²Ana higeno fri'zamo'a tagripina eriza e'nerie. Hianagi asimu erino manizamo'a tamagripina eriza e'nerie.

¹³E'ina hu'negu anama tamentinti nehunkeno avontafepima krenteana anage hu'ne, ***Nagra namentinti hute'na, kea huama hu'noehu'ne.*** (Sam-Zga 116:10) Tagranena tamentinti nehunku kea huama nehune. ¹⁴Na'ankure tagra antahi'none, Ramo, Jisasi'ma fri'nefinti azeri oti'nea Anumzamo, tagrira anazanke huno Jisasi ene magoka tazeriotino, tamagri ene tagri'enenaga Agri'a avurera tavrentegahie. ¹⁵Tamagri knarezanku, ama ana miko zana nehunankino, Anumzamofa asunkuzamo ra huno rama'a vahete vuno eno hania'zamo'a, Anumzamofa ra agi amino musema hunte'zamo avitegahie.

¹⁶Ana hu'negu tavresra nosie. Tamage tavufgamo'a frino negasrianagi, knane knanena avamutumofona erikasefa nehie. ¹⁷Hanki meni tagritema osi knazama fore nehiazamo'a, tagrira monafima umani vava hanunaza retro huneranteankita, knare huta monafi umani vava nehuta, knarezama omerisunazamo'a, makazana agateregahie. ¹⁸Hagi negonazantera tavua onkesunanki, onke'nonazante tavua kesune. Na'ankure negona zamoa omanegosie, hianagi okenona zamo'a mevava hugahie.

Kasefa tavufgamofa naneke

5 ¹Na'ankure tagra antahi'none, ama mopafi seri nopima mani'nona nomo'ma tagna vaziramisigeno'a, tagria mevava nontia (tavufga) vah'e'mo azanteti tro osu'neanki, Anumzamo tro hunteteno monafinka me'neankino mevava hugahie. ²Na'ankure ama nompi (tavufga) mani'neta tamage tusiza huta kragira neruta, monare kasefa mevava kukena huzankura tusiza huno tavenesigeta, avega ante'none. ³Na'ankure tagra ana kukenama hanuta, tagra tavufga tavapara omanigahune. ⁴Tagrama ama mopafi tavufgare'ma mani'neta tusiza huta kragira nerune. Na'akure tagra tavufa tavapako omnita kukena hunaku nehune. Hianagi monare kukena antaninunkeno asimuma erino manizamo fri tavufga ahe fanane hanigeta, mevava tavufga erigahune. ⁵Anumzamo'a ama agafare trohuranteno, Agra'a huhampirante'nea zampinti esera Avamu'a amne tamineankita, antahita keta hanuna, makazana amne tamigahie.

⁶E'ina hu'negu tagra hakare zupa hanavenetita, ama tavufgare'ma mani'neta zahufa Ramo enena omni'none huta nentahune. ⁷Na'ankure tagra onke'nonanagi, tamentinti nehune. ⁸Tagrira taguamo'a hankave e'nerigeta ama tavufga atreta Ramo'ene umanisunazanku tavenesie. ⁹E'ina hu'negu ama mopafima manisunano, Ramo ene umanisunano, Anumzamofoma ra agima amisunazankuke nehune. ¹⁰Na'ankure tagra ana miko'mota Kraisi avuga keaga refkohu trate otisunkeno, magoke magokemota ama tavufgare mani'neta, knare'zamo havizano hu'nesuna avamente anteno, mizana tamitere hugahie.

Vahe'ma avreno Anumzamofonte vu'zamofu naneke

¹¹E'ina hu'negu Ramofu koro hunte'za antahi'ama hunonku, hanavetita vahe'mokizimi antahintahia eriyama huta nezamavrone. Hianagi Anumzamo'a tageno antahino hu'ne, hagi nagrama nentahuana tamaganena tageta antahita nehaze. ¹²Tagra'a tavufga tamagrite mago'ane erisagahu kazigatira nosunanki, tagriku'ma tamavufgama erisagama hanazazanku nehune, hu'negu amega zamufare'za nege'za znavufga ra nehu'za, zmaguafizama nonkaza vahera, kenona huzmantegahaze. ¹³Na'ankure tagrama neginagizama nehanuta, e'i Anumzamo'agi erisiegu nehune. Hagi tagrama fatgo antahintahitirema manisuta, e'i tamagri knarezankure. ¹⁴Kraisi avesizamo kva huranteno tazeri onetigeta tagra antahinone, na'ankure magokemo, miko'mofonku huno frine, e'ina hu'negu ana miko'mota fri'none. ¹⁵Hagi Agra miko'mofonku fri'negu, iza'o kasefa huno maninesimo'a, agra'a vesizantera omanigahe. Hianagi zamagriku'ma huno fri'teno oti'nemofu Kraisi avesizante manigahaze.

¹⁶E'ina hu'negu menintetima agafa huno vaniana, vahe'mokizimia amega zamufgarera refko huozmantesune. Ana hu'negu tagranena anahukna huta Kraisina amega avufgare refakora hunte'nonanagi, menina antahi'none anara nosune. ¹⁷E'ina hu'negu mago'mo'ma Kraisimpima manisimofona Anumzamo'a azeri kasefa vahe fore nehie. Antahi ani huo, korapa avu'avamo'a fnane nehigeno, kasefa avu'ava fore nehie. ¹⁸Ama ana kasefa huno mani avu'avara Anumzamofontegati e'ne. Kraisimpi tagrira tazeri mago nehuno, erimago huno mani erizana tagri tamine. ¹⁹Na'ankure Anumzamo'a Kraisimpi ama mopafi vahera, Agrane tazeri mago hu'ne, vahe'mo'zama kumi'ma hu'nazana antahizmino nona hunozmante. Hagi erimago huno manizamofu knare naneke huama hanunegu, tagrira tami'ne. ²⁰E'ina hu'negu tagra Kraisi agi erita mani'none. Higeno Anumzamo'a vahe'agura tagripi huvazino kea nehie. Ana hita tagra Kraisinku huama nehanunketa tamagra Anumzamo'enena erimago hugahaze. ²¹Na'ankure Anumzamo'a kumi'a omnenea ne'mofu Kraisina tagri kumiku, azeri kumi vahekna nehuno, tagri kumira Agumpi erinte'nea zamo, tagrira Anumzamofu avure tazeri fatgo vahera nese.

Aposol naga'mo'za eri'zama e'neriza rama'a knaza eri'naza naneke

6 ¹Tagra eri'zama e'nerunana magoka Anumzamo'ene e'neruna nagamota hankavetita neramasmune, Anumzamofu asunku'zana eriteta, atrenkeno amnezanknara osino. ²Na'ankure Anumzamo'a anage hu'ne, ***Kna fatgore ketmia nentahi'na, tamagama'vazikna fatgore tmaza hu'noe*** hu'ne. (Ais 49:8) Antahiho, menina Anumzamo'ma tagu'vazino tmavre'naku'ma hunte'nea kna fatgore menina mani'none.

Poli'ma knazampi ufreniazamofa naneke

³Mago'mo'ma kama vanoma nehifina, tagra zamazeri tanafahu have erinteaknara nosune. Ana hu'negu tagrama eruna erizamofontera vahe'mo'za tazeri tagaze osugahaze. ⁴Hakare'azama humpina Anumzamofa eriza vahe mni'none huta eriamana nehune. Hakare'a knazampima ufronana kazigazi huta nevuta, maka tatafima nevuta, knazampina ufronke'za, ⁵kanonkevea neramiza, kina nonpina tavrenentazageno, erizamo'a amuhu nehigeta, tavura omaseta ne'zana ononkeno, tagazankura nehuta, ⁶manifatgo huta nemanita, antahintahia e'nerita, akoheta nemanita, so'e avu'avazana nehuta, Ruotge Avamupina nemnita, tamage avesizamofa avu'avazana nehuta, ⁷tamage kema huama nehumpine, Anumzamofa hankavefina, fatgo mani'zamofa ha'zamoa tamaga tazampine hoga tazampina me'negeno, ⁸mago'amo'za rantagia neramizageno, mago'amo'za husaga hunorantaze. Tamage kea hunerantazageno, havige kea hunerantaze. Tagra tamage vahe mni'nonanagi, krunagea vahere hunerantaze. ⁹Tagrira tage'za antahiza osu vahe kna nehunanagi, tagrira miko vahe'mo'za tage'za antahiza hu'naze. Fri avamente knazampina nevunanagi, kasefa huta nemanune, kanonkeve tami'nazanagi tahe ofri'naze. ¹⁰Tasuzampi mani'nonanagi, muse huvava nehune, tamuntera omane'neanagi, rama'a vahe zmaza hunke'za feno vahera nemnize. Fenona onte'nonanagi (avamupina) feno vahekna nehune.

¹¹Korinti kumate vahe'mota, magozana fra'nokunanki, tagu'areti tamage huta kea nermasamune. ¹²Tagra tamagrira tavesi nermanteta tagu'a kafana anagi nermantonanagi, tamagra tavesi noranteta, tamagu'a kafana anaginantaze. ¹³Nagra neramasamue, tamagrira osi mofavre asmiaza hu'na nermasamuanki, tamagranena tamagu'a kafana anagiranteho.

Kefozane tragoteta omnisuna naneke

¹⁴Anumzamofonte zamentinti nosnaza vahe'enena tagroteta omaniho. Inankna huno fatgo avu'avazane, kasegema ovariri avu'avamokea erimago hugaha'e? Msazane hanizanena inankna hune erimagora hugaha'e? ¹⁵Kraisia inankna huno Sata'enena mago rimpa hugahie? Nankna huno amentinti nehia vahe'mo'a, amentinti osu vahe'enena, mago antahintahirera manigaha'e? ¹⁶Hagi inankna huno Anumzamofa mono none, havi anumzamofa mono nomo'a erimago znarimpa hugaha'e? Na'ankure tagra asimu erino maninea Anumzamofa mono noma'a mani'none. Anumzamo'a anage hu'ne, ***Nagra zamagu'afi mani'nenana, zamagri'ene kana vano hugahue. Nagra zamagri Anumza mani'nugeno, zamagra nagri vahe manigahaze*** hu'ne.

(Lev-Pri 26:12) *17*E'ina hu'negu, *zamentinti osu vahepintira atiramita rure maniho* huno Ramo'a hu'ne. *Agruma osu'nesia zana avako osnage'na, Nagra eme tamavregahue.* *18**Nagra neramafana mani'nanena, tamagra mofavre zgania manigahaze huno Hanavenentake Ra Anumzamo hu'ne.* (Ais 52:11)

7 *1*Na'ankure tagrira Anumzamo huvempa hurante'negu, navesima neramantoa ronanimota, tagra'a tazeri avusese hanune. Ama tavufgafine avamupima miko kefozamo'ma tazeri haviza hania zampintira, mani ruotage nehuta Anumzamofu koro huntunesune.

**Korinti vahe'mo'za zamagu'a rukrahe
hu'nageno Poli muse hu'nea naneke**

*2*Tamagra tamarimpa tamiho. Tagra mago vahera havizana huonte'none, mago vahera azeri haviza osu'none, mago vahera tagra knare'zankura revatga huta azeri haviza osu'none. *3*Nagrama ama'i kema nehua, tamagra havi vahe mani'naze hunoramantoe. Na'ankure koma tamasimi'none, tagra tamagri ene magoka manisuno, tamagri'ene magoka frisunana tamagra antahintahifi mni'naze. *4*Nagra tamagrira razampi antahinerami'na, tamagrikura tusi muse nehugeno, nagu'amo'a fru nehigeno, tamagrama hazazamo'a nagrira naza higena, mika knazanifina tusi muse nehue.

*5*Na'ankure tagrama Masedonianema efronkeno'a, ama tavufgamo'a manifru osu'ne, rama'a knazamo mika asoparegati egeta hapi ufronkeno, tagu'amo'a kore nehie. *6*Hu'neanagi knazamo zamazeri haviza nehia vahe'mokizmi zamazeri hankavenetia Anumzamo tazeri hankavetineana, e'i Taitusi'ma e'nea zamo'e. *7*Agrama e'nea zamokero'ompage, agri'ma azeri hankaveti'naza'zamo'e. Agra nagriku'ma navegama ante'naza'zamofu nanekea nenasamino, nazano fore'ma higeta tamasuzampima maninaza'zamofone, nagriku'ma nentahiza'zamofu nanekema nasamigeta, mago'ane tusi muse hu'noe. *8*Na'ankure avoma kreramisua zamo'enema tamasuzampima tamavrentesuana, nagra e'i anazankura nagesa ontahigosue, na'ankure e'i anazamo'a osi'a knafi tamatazana tamigahie. *9*Nagra menima avoma atreramantesua zankura muse nehue. Tamagri tamazeri tamagaze hunakuro ompage, tamata neraminketa tamagu'a rukrehe hanazegure. Na'ankure Anumzamo, vahe'mo'za erisazeguma avenesiankna tasuza e'nerisunkeno, tamaza hanigeta tagripintira mago'a knazana e'origahaze. *10*Na'ankure Anumzamo'a tagripima me'nea tasunku zampi huvazino taza hanigeta, kumira atreta tagu'a rukrehe hanunkeno taguravazina, tagra knazantigura tagesa ontahigahune. Hianagi tasunkuke nehuta tagu'a rukrehe osnunana, fri'za erifore hugahie. *11*Keho Anumzamo'ma neramia knazamoma tagripima asunku'za erifore nehiana, tamazeri o'netigeta kazigazi huta

tamagra'a tamazeri ama nehuta, antahi haviza nehuta, tamagu'afi kore nehuta, nagri'ma nagezankura tusiza huno tamavenesigeta, hanavetita havizama hu'nea vahera zmazeri fatgo nehuta, makazama hanafina fatgo zanke'za hiho. ¹²Ana hu'negu iza havizana higeno, iza havizana huntene hu'na, e'i agafare avona krenoramue. Anumzamofu avufina inankna huta kva krinerantaze, tamagra eriamu hugahaze. ¹³E'i ana miko'za hazazamo'a, trimpa so'e nehie. Amama tarimpamo'ma so'ema hirema mago'ene musema huramantonana, Taitusima konkeno musema nehuno avamu'afima tamagripintima fruzama eriazankura muse hune. ¹⁴Tamagriku'ma musema nehua zankura, ko agrira asami'noe. Hagi tamagra nazeri nageze osu'naze, nagra tamagege'za tamasm'i'noe. Hu'negu tamagriku'ma muse nehune huta Taitusima nesamuna zamo'a, tamage'za efore hugahie. ¹⁵Taitusi'a agri'ma nevreta, ke'ama mikomota antahinemita, kore hunteta amagama antenaza zankura, tusiza huno tamagrikura antahineramino agera nokanie. ¹⁶Nagra tusiza hu'na muse nehu'na, hakarezana amne hugahaze hu'na antahineramue.

Muse huno Anumzamofu ami'zamofu naneke

8 ¹Nenfugata, Anumzamofu asunku'zama'areti, Masedonia mono vahera zamaza hu'nea zamofu agenke tagra tmasaminaku nehune. ²Zamagripina tusi'a knaza fore nehige'za, zmarevatga zampi ufrenazanagi, zmarimpa kna nosu'za, ra muse nehu'za, fenozami omneneanagi, zamagu'areti fenona zami'naze. ³Na'ankure nagra eriamu hu'na tamasmiza hue, zamagrama amiga'a avamentera agatere'za, zamagra'a zmavesite rama'a nezamize. ⁴E'ina nehu'za, Anumzamofu naga'ma Jerusale mni'naza naga'ma, zamazahu muse'zama zamagranema zamizankura, tusiza hu'za tantahigevava hu'naze. ⁵Hagi e'inahu hugahaze huta tagesa antahi ozamunanagi, pusazana zamagrazmi Ramofu amite'za, Anumzamofu avesite tagrira tami'naze. ⁶E'i ana hu'negu zgo eritruhu eri'za tagripima erigafa hu'nemo, Taitusi'a tamagrane umani'nenno tamazahina, ana erizana eri vgaregahaze. ⁷Hianagi tamagra hakare zampina knare hu'naze, tamentinti zampima, kegaga huzampima, mika Anumzamofu erizankura kazigazi nehuta, tagrikura tamavesi nerantaze. Ana hukana huta amizampina vugota hutma muse'zampinti zamiho. ⁸Nagra ama kema nehuana, amiho hu'na huhankvetina hunormantoe. Hianagi rumo'za kazigazi hu'za nezamizankna huta zmavesinezmenteta, zamigahazafi hu'na reramahena kenaku nehue. ⁹Na'ankure Rantimofu Jisasi Kraisi asunku'zana tamagra antahi'naze. Fenone nemo'agi, tamagriku huno amunte omne nekna hu'ne, e'i anama hu'neana Jisasi amunte omnezama'afinti feno vahe tamazeri feno vahe fore hanigure. ¹⁰Zago eritruhu erizamofonku nagrani'a antahiantahi hu'ama huzahue. Koma evia kafure zgo eritru huno ami eri'zana

tamagra'a erigafa huneta, ana erizankukera osunazanki, tamagu'areti ene huta ami'naze. ¹¹Menina ana erizana eri vagaresageno, tamagu'areti tamavenesigeta zgo ami eriza eri vagaregahune huta hu'nazazamo'a, zgo ante'naza avamente magozahu hugahie. ¹²Na'ankure mago'mo'ma feno amizamofu avesizama me'nenkeno'a, onte'nesia avamentera omigahianki, nazano ante'nea avamente aminigeno'a, Anumzamofu muse hugahie. (Mak 12:41-44) ¹³Tagri tavesimo'a ruga'amokizmi nezamisageza fru hu'za manisnageta, tamagra atupa huta manisnaze nosunanagi, mni'naza avamente manisnazegu nehune. ¹⁴Menina tamagripi rama'a me'negu, atupa hu'za mani'naza vahe zamaza hanageno, henka'a tamagrama atupa hanageno'a tamaza hugahaze. E'i ana hanuta magoke avamente manigahaze. ¹⁵Anumzamofu avontafepi anage huno krente'ne, ***Rama'neza eritru hu'namo'za agatere'za rama'a nontaze, hagi osia'a nezama eri tru hunamoza atupara osu'naze.*** (Diu-Kas 16:18)

¹⁶Tamagriku kazigazi hu'na antahi neramuankna antahintahi, Taitus ami'nea Anumzamofu muse hunentoe. ¹⁷Na'ankure Taitusi'a tagrama hu'na nanekereke ovianki, tamagenakura agra'a avesirmantene, kazigazi huno tamagritega e'ne. ¹⁸Mago nerafu, Jisasi knare muse ke huama nehige'za maka mono vahe'mo'za agenke'a antahinaza nera, tagra huntonkeno Taitusi ene vu'na'e. ¹⁹Ana nera mono vahe'moza Jerusalema zgoma omezminaku'ma hanunana, tagrane vugahie hu'za huhamprintenea ne'mo, tagranena vugahie. Anumzamofu ra agi aminaku anara nehuta, tamage huta zamaza hu'zana eriamu hugahune. ²⁰Hanki mago'mo'e huno antahi haviza huorantenogu, rama'a vahe'mota magoka ana musezama tami'neazana kva huta erita neone. ²¹Anumzamofu avurekera fatgo huta omanisunanki, vahemofu avure enena fatgo huta manisunazanku tavenesie. ²²Ete mago nerafuna hakare zupa rehetu konana, mikazampina fatgo huno nemnino, Korinti vahe'motagu antahineramino tmaza hunaku nehia nera, Taitusi zane vugahaze. ²³Hanki Taitusi'a tmaza hu'naku nagrane eriza e'neria nere. Hagi agrane tare vna'a nerafukiznia mono nagapinti huznente'naze. Kraisi agi erisaga nehza vahe nevaze. ²⁴E'ina hu'negu zamesi'nezmanteta zmazeri so'e nehinke'za, Anumzamofu nagamo'za nege'za, Poli'ma Korinti vahe'mokizmi zamavu'zmavaku'ma nehiana tamage hu'ne hu'za hugahaze.

Jerusale mani'naza Anumzamofu naga ofa zgo zamaza hnaza naneke

9 ¹Jerusale mni'naza Anumzamofu naga zgo zamisune hu'naza zankura avona nagra kretamimi'na huramagesa hugara osu'noe. ²Na'ankure nagra antahi'noe, tamagu'amo otigeta zamaza hunaku retro'ma hu'nazana, Masedonia mono vahe, musezampinti zamasamina amanage huno'e, ko'ma evia kafufina Griki kaziga Akaia kumate nemniza vahe'mo'za, Juda

vahe zamaza hu'naku ko retro hu'naze hu'na tamagriku zamasm'noge'za, nentahiza zmagu'amo otige'za hakare vahe'mo'za anahukna huta zamigahune hu'naze. ³Hianagi Taitusine tare nerafukizni tamagrama mni'narega nagra hunezmantoe. Tamagri tami'naku ko retro hu'naze hu'na hu'noa kema zmasaminoa zamo'a, amnezankna hanigi, tro hunenke'za viho. ⁴Masedonia vahe'ene ru nevnugeno, ana zgo eri tru osunesageta, ko eritru hu'naze hu'na hu'noa ke'mo'a, amnezankna hinketa, tamagrane naganena tagazegu hugahune. ⁵E'ina hu'zanku nagrama nagesa antahuana nerafukizmima huzmantesunke'za tamagra mni'narega vugotesageta, koma eritru huta zamigahune hu'naza zgoa retro hu'nesageta vugahune. E'ina nehuta muse hutma zgoa nezamizageta, tagra zgotamia tutu huta avazu nosune.

⁶Nagra menina amanage nehue, osi'a avimzama nesaza vahe'mo'za, osi'a ana avamente nezana nevasgaze. Hanki rama'a avimaza nesaza vahe'mo'za, ana avamente rama'a nezana nevasgaze. ⁷Ana hu'negu magoke magokemotma aminaku'ma hanutma, tamagu'afima amigahune hutma tamagesa antahinesazama'a amiho. Vahe'mo tutu hinketa tamarimpa knazanena omiho. Na'ankure muse huno ami'mofonku, Anumzamo'a avenesie. ⁸Anumzamo'a knare huno makazampina asunkuzama'a eri avitermantena, aviteta mani'neta, mika zupa rama'a me'nesnifinti knare tamavu'tmava huta vahe'mofona zamaza hugahaze. ⁹Anumzamofu avontafepinema krente'neana, ***Iza'o refko huno amunte omane vahe, musezama nezmia vahe'mofona, Fatgo avu'avazama'amo mevava hugahie*** hu'ne. (Sam-Zga 112:9)

¹⁰Anumzamo hozama kri vahe'mofona avimzana nezamino, bretia nezane huno nezamie. Anahukna huno avimzana veva huno erira nehina, fatgo avu'avazantamimo'a rga'a nerena, rama'a nevasageta mago'ane vahe'mofona zamaza hugahaze. ¹¹Hakare zampina rama'a asomu hunermantena, vahe'ma zmaza hanazana rama'a zmaza nehnageno, Anumzamofona ra agi ami'za susu huntegahaze. ¹²Na'ankure ama'i vahe'ma azahu erizama e'nerizazamo'a, Anumzamofu nagakera zmaza nosianki, Anumzamofu susu huntetzampinti, ra agi amizamo'enena avinete. ¹³Na'ankure vahe'ma zmaza huta knazami erizamo, knare tamavuta eriamu hina nege'za, Kraisi knare musenkemofona amagenentaze hu'za huama nehu'za, Anumzamofona ra agi erisaga hugahaze. ¹⁴Nunamuzamifina tamagrikura antahineramiza nunamuna hunermantaze. Na'ankure Anumzamofu mriagatere asunkuzamo tamagrite'ma me'neazanku anara nehaze. ¹⁵Vahe'mota e'inahu kna nehie huta erinteama osuga muse zama neramiazankura, Anumzamofona susu huntesine.

Poli'a erizama'a azeri hanavetike hu'nea naneke

10 ¹Nagrani'a Poli'na, Kraisi anterami avu'avazampinti'ene fru avu'avazanteti tamantahinegoe. Nagra tamagranema mani'nena

fru avu'ava huramante'noanagi, afete'ma mani'nena hanave naneke huneramantoe. ²Nagrama tamagritega vanu'na hankve kea osnuegu nentahue. Hianagi nagra esu'na tagriku'ma vahe'mofu antahintireti havi eri'za e'nerize nehaza vahe'mofona hanavege eme huzmantegahue. ³Tamage mopafi vahe mani'nonanagi, mopafi vahe'mo'za hzaza huta hara nosune. ⁴Ha'ma huzantamima azeri'nonana, ama mopafi ha'zana omne'ne. Anumzamofu hankve ha'za me'neankino, Sata vihua ahe'nafru hugahie. ⁵Tagra hakare'a havi antahintahine havigemo'enema renkani renentegeno vahe'mo Anumzamofona antahi ama nosia antahintahizmia, zmazeri rukrehe hanunke'za Kraisi amagera antegahaze. ⁶Tamagrama amage'ma ante ftagoma hanageta, veganokno nehu'za, ke rutrage'namokizmia, ana nona'a knaza zamigahune.

⁷Tamagra mago'amota amega avufgage negeta agu'afina nonkaze. Hagi Kraisi vahe mani'noe huno hanave antahintahi nentahinimo'a, atregeno agra'a agu'afi refko huno negeno, nagra Kraisi vahe mani'noe huno nentahina, tagra'enena Kraisi vahe mni'none hugahune. ⁸Na'ankure Ramo'ma kva vahe manigahaze huno tazeri otigeta mni'neta tavufga rama nehunana, tamagri tamazeri so'e hunaku anara nehunanki, tamazeri haviza hunakura anara nosunankita, tagra tagazegura osugahune. ⁹Hanki tmazeri koro hunaku ama avontamina krenoramue. ¹⁰Na'ankure mago'amo'za amanage nehaze, Poli'a avontafepina hankave ke kreneramino, tavure'ma ne-eno'a, akoheno kea nehige'za, amnege nehie hu'za nehaze. ¹¹Hanki anagema nehnana vahe'moka antahio. Avontafe'tamimpima hanave kema krerami'nonankna huta tagrama esuta, hanavege eme hugahune. ¹²Na'ankure mago'amo'za knare vahe mani'none nehaza vahera nezmageta, tagratia zamagriteri refko huta nonkone. Hianagi zmagra'a mani'naza avamente refko hu'za nege'za, tagra knare vahe mni'none hu'za refko hu'za negaza vahe'mo'za, negi vahe mani'naze.

¹³Hianagi tagra mni'nona avamena agatereta tavufa ra osugahune, hianagi Anumzamo'ma e'inahu huta erizana erita kegva huzmanteho huno hurante'nesia avamente mni'neta, kegva hurmantegahune. ¹⁴Na'ankure tagrama ese knazupa Kraisi Knare MusenKe, erita tamagrama mani'narega Anumzamo'ma eriho hu'nea avamente Korintima mni'naza nagamotare uhanitinona zamofonkura, agatereta tavufga erisaga nosune. ¹⁵Magore huta rumo'za eri'za eri'nazazante tavufga ra osu'none. Hianagi tagripima fore hanigeta kesune huta antahi neramunana, tamagri tamentintimo nehagenkeno, erizama tamagripima erisunazamo'a ra huno hageno vanie huta nehune. ¹⁶Ana hu'negu, mago'mo'e huno Knare MusenKe huama osu'naza afete kumatamimpina, tagra ome huama huta vugahune. Na'ankure koma erizama rumo'za e'rinesaza kumatamimpina ome e'nerisunkeno tagenoka

osnazegu nehune. ¹⁷Hianagi avontafepina anage hu'ne, *iza'o avufga rama hu'nakuma hanimo'a, Ramofoma keno antahino hu'neazanku avufga ra hino.* (Jer 9:24) ¹⁸Na'ankure agra'agu knare hu'noe huno nehimo'ompage, Anumzamo'ma hu izo hu'nesimoke agra'agura musena hugahie.

Havige Aposol vahe'mokizmi kemo amate efore hania naneke

11 ¹Nagra neginagi naneke huzahuanki akoheta mni'neta antahiho. ²Kraisinte knare hutma mnisazegu hanave antahintahi nehue. Nagrama magoke vere, Kraisinte manisazema hu'noane. Vene omaseno agru hu'nea a'kna hu'nesage'na, tamagrira Kraisinte tamavrentesuegu nehue. ³Hu'neanagi nagra kore'ma huana, krunage osifavemo Ivi revatga hu'neakna huno tamagrira, reramataga nehinketa fatgo huta, ruotge hu'neta Kraisi amage nevza kana netreta tamagena humizanku nehue. ⁴Tagra Jisasi naneke nermasamunketma nentahitma, Ruotge Avamura e'nerita nanekema tamasamunana antahi rami'naze. Hianagi tamagra atrazageno ru vahe'mo'za ne-eza, ru mago Jisasi nanekene, ru Avamumofu naneke nermasmigeta, nentahita fru hutma ana nanekemofu amage nentaze. ⁵Ana hankave aposol eri'zama e'neriza vahe'mokizmia, nagra zamagri zmagorga'a omni'noankiza, zamagra nagateore'naze. ⁶Hianagi nagra nana naneke hu'zana rempi hu'na ontahi'noanagi, antahintahi zania me'ne. Hakare kampinti, eriamu hu'nogeta makazana ke'naze.

⁷Nagrania anteneramina, tamagrama knare hnazegu mizama'a omne Anumzamofu Knare Musenke tamasamua zamo'a, kefoza hu'na kumi nehufi? ⁸Nagra tamagri'ma tamaza hunakura musufa aseankna hu'na ru mono nagatetira musezamia erina, tamagri eme tamaza hugeta, tamagra mizana ose amne e'nenerize. ⁹Hagi tamagrane mani'nena magozankuma atupahua knafina, magomofona kna ami'na nazahuo hu'na osu'noe. Masedoniati e'naza nerafu'za, atupama huazantamina namizage'na eriknare hu'noe. Nagrira naza hnazegura knazana noramuankina, henka'anena anazanke hu'na knazana ontamigahue. ¹⁰Tamage huno Kraisi tamage nanekemo nagu'afi me'nesigena, nagri'ma naza osazazankura Akaia kumate Grisi kaziga huama nehanuge'za, tagano hu'za huonantegahaze. ¹¹Na'a hige'na e'inahu naneke nehue? Tamagrikura nave'nosifi? A'o tamagrikura navenesie, Anumzamo'a antahine.

¹²Hianagi nagrama amama nehua navunavara hu'na nevanenke'za, zamagrama nagriku'ma mago'zanke hu'none nehu'za zamufga rama nehazana ahepasaru hanenkeno evuramigahie. ¹³E'inahu vahe'mo'za havige aposol vahe mani'ne'za, havige eri'za vahe mani'ne'za, amega zamufarera Kraisi aposol mani'none nehazanagi, zmagu'afina krunage

apospel vahe mni'naze. ¹⁴Na'ankure antri osiho, Sata'enena krunage huno msa ankeru vahe kna hugahie. ¹⁵E'ina hu'negu antri osiho. Sata eri'za vahe'mo'za krunaza hu'za fatgo eri'za vahekna hugahaze. Ana nona'a eri'zama e'neri'za avamente mizama'a, henka'a erigahaze.

Poli'a Kraisi erizante knaza eri'nea naneke

¹⁶Mago'ane nerasmue, mago'mo'e huno nagrikura neginagi nere huno antahintahia osino. Hianagi neginagi nere huta antahinenamisuta, osi'a nagranena navufga erisagahu nanekema hanuana, neginagi vahe'mofoma antahimia kna huta antahinamiho. ¹⁷Nagra'agu'ma husagama nehuna, neginagi vahe kna nehuana, Ramo huo huno osu'nea naneke nehue. ¹⁸Hakare vahe'mo'za zamagra zamavufga, ama mopafi vahe'mo'za hazaza hu'za erisaga nehagu, nagranena anahukna huna navufga erisaga hugahue. ¹⁹Tamagra neginagi vahe'mokizmia knare huta antahinezamize, na'ankure tamagra knare antahintahine vahe mani'naze. ²⁰Tamage, tamagra zamatrazage'za vahe'mo'za tamazeri kazokzo eri'za vahe kna huneramante'za, reramatga nehu'za, tamagripinti musufa e'neriza, zamagra zamufga eri sga nehu'za tamavugosafi neramahazageta ke nosaze. ²¹Nasunku huanki tagrira hanavetia omaneneankita e'ima hazazana osugahune! Hianagi mago vahe'mo'ma agra'a avufgama erisaga hinkena, nagranena anazanke hu'na navufga erisaga hugahue.

²²Ana vahera Hibru vahepi? Nagranena Hibru nere. Zamagra Israeli vahepi? Nagranena Israeli nere. Zamagra Abrahamu nagapinti efore hunazafi? Nagranena Abrahamu nagapinti efore hu'noe. ²³Zamagra Kraisi eriza vahepi? Ama nanekema hanuana neginagi vahe'mo'za nehazankna nehue. Nagra zamagterena tusiza hu'na Anumzamofu eri'za e'nerina, zamagterena kina nompina rama'a zupa manina, rama'a zupa kanonutira nahetere hazage'na frikante vu'noe. ²⁴5fu'a zupa, Jiu kva vahe'moza kefo vahe hampriza nezmahaza kna huza 39ni'a zupa sefu knonkeve namiza navufga rutraga hutere hu'naze. ²⁵3'a zupa kumpa knonuti knonkeve nami'naze. Hanki magoke zupa have knonu nahenaze. 3'a zupa ventefi nevugeno haviza huno hageri tamigena, tina nakrikatetena, mago zageferuki, mago haninki huna hageri amunompi mani'noe.

²⁶Hakare zupa vano hufina, rama'a hazenkefi ufre'noe, ti nehegefi tina marekanetogeno, kumzafa vahe'mo'za nahe'za nehazageno, nagrini'a naga'mo'zane, megia vahe'mo'za nahe'kate'naze. Rankumapi manige, ka'ma kokampina nevuge'za nazeri haviza hu'za nehazegeno, hage'rimpima fnane hu'za nehugeno, havige nerafu'zanena nazeri haviza hu'za hu'naze. ²⁷Amuho hu'na tusi'a eriza e'nerina, mago'a kenagera navura ovase'noe. Nezane tine omnegenaga nagazanku nehugeno, tinku enena navesine. Kukenani'a omanegenaga zasimo enena nazeri haviza hu'ne. ²⁸E'i ana knazama eri'nofinena, mago mago knafina mono kevugura, inankna hu'za nemanize hu'na tusi antahiantahi

nehuazamo'a kna nami'ne. ²⁹Mono vahe hanave'a omanegeni, nagrira hanaveni'a me'ne? Mago'mo kumipima ufregena, nagra narimpa kna hu'noe.

³⁰Navufga erisaga hanuna, nagrira hankaveniama omanenea zama naverima nehiazanku navufga ra hugahue. ³¹Anumza Rantimofa Jisasi Nefa antahinege'na tamage nehuankino, ra agia erivava hugahie.

³²Damaskasi kumate'ma maninoa knafina, Kini Aretasi agorga'a mani'nea gavana ne'mo, rankumamofa kafantaminte mni'neni nazerinaku kava vahe huzamantegeza kava hu'naze. ³³Hianagi nagrama zamatre'na frenoana eka'eka kupi mani'noge'za nofite azerine'za natrazagena, zaho eri kampinti (windo) fegu'a uramina zamatre'na fre'noe. (Apo 9:24-25)

Poli'a avanagnaza ke'nea naneke

12 ¹Navufgama erisaga huzampintira mago'zana e'noruanagi, Ramo oku'ame'nea zane avanagnaza naveri hu'neazanku navufga erisagahu kea hugahue. ²Nagra antahi'noe, 14ni'a kafu evunefina Kraisi ene hagerafi'nea ne'mo, nampa 3 monafinka (mareri agatere kumate) marerineana amega avufgarero, avamupino manineno mreri'neo nagra ontahi'noe, Anumzamoke antahine. ³Ana nera nagra ontahi'noe, amega avufgarero avamupino, nagra ontahi'noe, Anumzamoke antahine. ⁴Hianagi Monafi (Paradise) avreno marerigeno, agra vahe'mo huama osuga'za ome antahine. ⁵E'i anazama naveri hu'nea ne'mofonku hu'na navufga ra hugahue, hianagi nagra'agura navufga ra osugahue, hagi hanaveniama omanenesiazanku navufga ra hugahue. ⁶Nagra navufga rama hanuana neginagi vahekna osugahue. Na'ankure nagra tamage nanekege'za hugahue. Hianagi nagrira antahi ra huonantesazanki keniare'ene navunava zaniare kesazegu mago'zana nosue. ⁷Na'ankure oku'ma me'nea knarezantafama Anumzamoke naveri higena ke'noe. Hianagi e'inazante negena ra nagi erizankura, nekzagna zamo navufgafi nenreana, e'i Sata eriza vahe'mo nata nenamino, nazeri haviza nehiankina navufga ra osnugu anara nehie. ⁸Ama ana natama negriazana Ramo eritrenantesegu, 3'a zupa kazigazi hu'na antahige'noe. ⁹Hianagi Ramo'a amanage huno nasmine, Nagri nasunkuzamo'a knare kagrira hugantene. Na'ankure hanave ka'a omanesirera, Nagri hanavemo'a knare hugantegahie. E'ina hu'negu, Ramofo hankavemo'a knarezantafa huno refite nantegahiankina hanaveni'a omanesifina muse nehuna navufga ra hugahue. ¹⁰E'ina hu'negu, kema nasazano, nazeri haviza hanazo, knaza fore hanio, amuho erisua knafina rama'a muse nehuna, narimpa fru hu'na hanavenia omnea knafina nemanue. Na'ankure Kraisinku hu'na hanaveni'a omanea knafina, hanavenia e'nerue.

Poli'a Korinti vahe'mo'za zmentintifina hankaveti'za manisagu krezaminea naneke

¹¹Tamagra nagrira knare hu'ne hutma nazeri ante'ama hugaragi, netreta nagrira nazeri neginagi vahekna nehaza zankura, nagra navufga ra nehue.

Na'ankure nagra amneza mani'noanagi, ugota aposol vahepina henkarfana omani'noe. ¹²Tamage aposol vahe'mofo avame'za tamagri amunompi hunoazama kesazana, avame'zama, kagu'vazama hanavenentike eri'za erino kazigazi huno vanimo'e. ¹³Na'ankure mago'zahu navunava ana miko mono nagapina nehuanaagi, magoke'zama nagrama huoramante'noana tamagrama kva hunantesazeguma knama orami'nozamo'e. E'i kefozama hu'nesuana nasunku huanki kefozania atrenanteho.

¹⁴Hanki antahiho, ko tare zupa ome tamage'noe, meni mago'ene ome tamageku nehuankina tamagrira kna ontamigahue. Na'ankure mofavremo'za nerera nefazana kva hunonteanke, Nererake nefake mofavre'amo erinizana antenteno nevuno kegva hunente. Ana hunegu tamagripintira mago'zana e'origahuanki, tamagri tamagu tamemo so'e hanigu navenesigena nehue. ¹⁵Tamagri manizanku hu'na nagra navufgane, maka'zaniane neramue. Hagi rama'azampima navesineramantesugeta, tamagra osi'a tamavesinantegahazo?

¹⁶E'inahukna hu'negu tamage hu'na knazana noramue. Hianagi tamagrama antahizana krunage nehuno musufasenaku nehie hutma nagrikura neheze. ¹⁷Nagrama huzmantoge'zama tamagrira tamaza hinogu vu'naza mono vahepintira, mago'a nazahuzana reramatga hu'na enerufi? A'o nagra anara osu'noe. ¹⁸Nagrama, Taitusine mago nerafunema tutu hu'na huznantogene tamagritega vuna'ana Taitusi'a reramatga huno mago'a azahu zana erinefi? I'o tamagra antahi'naze, Taitusi'ene nagra nena magoke avamuteti magozahu huta eriza e'neru'e.

¹⁹Tamagrama tamagesa antahizana, tagrikura zmagra'a ke erihanavetinaku nehaze hutma tamagesa nentahizafi? Tamage e'inahu tamagesa nentahizanagi, Anumzamomo avurera Kraisinku keaga nehuta tamagrira tamaza hanigeta hageta mrisisaza zanku tamavesi neramantona nerafugatagu nehune. ²⁰Na'ankure nagri'ma namnomavaziana esua zupa nagri'ma naveosi nesiazama tamagripima eme nege'na tamave'osinesizama huzankure. Nagri'ma namnovaziana, tamagripima eme neramege'na, amunontamifi ke ha' huzama, kanive rezama, arimpa hezama, atanezama, havige ohunte ahunte huzama, ogenke agenke huzama, veganokno huzama, manifatgo osuno makaza erisavri hu avu'avazanku nehue. ²¹Nagra ete'na ome tamagesua zupa, Anumzamo tamagri tamavufima nazeri nagaze huzankura kore hue. Na'ankure hakaremotma korapa kumitami'a tamagu'a rukrehe osu'naze. Tamagra savri avu'avaza nehutma, monko avu'avaza nehutma, agazehu avu'avaza hu tamaga tevava nehiazankura nagrira zavite nagesa nehie.

Korinti vahe'mo'zama manizazmi refko hu'za kesaza naneke

13 ¹Ko tare zupa tamagrira eme tamagenoreti, menina eme tamage'naku neoe. Hagi avontafemo'a anage hu'ne. ***Mika tamage***

kemofona tareo tagufa vahe'mofo nanekemo hutmagea hanigeno, anankemo'a tamagea megahie. (Diu-Kas 19:15)

²Nagra ese'ma ete'na anantema e'norera, kava huta maniho nanekea ko tamasmi'noe. Hagi menina tamagri enena omninoanagi, mago'ane kumima nehaza vahetamine, mago'a vahetaminena kva huta manisaza nanekea neramasamue. Nagrama henkama esnuna kumima nehaza vahera tamazo onkigahuanki, knaza emeramigahue. ³Kraisima nagri nagipi huvazino nehia kemofa agafa'a kesuneguma nehaza zankura, emeri ama hugahie. Kraisima tamagripima erizama eneriana fru huno e'norianki hanavetino erizana enerie. Agra himamu hankave tamagripina me'ne.

⁴Tamage, hanave'a omanegeni keka zafarera fri'ne. Menina Agra, Anumzamofa hankavere kasefa huno asimu erino mani'ne. Na'ankure tagri'enena anahukna huno hanavetia omneanagi, Kraisi'ni mani'neta Anumzamofa hanave erineta, ana hanavereti tamagripina erizana e'nerune.

⁵Tamagratmi'a avame antetma tamagu'a refko huta keho, tamentintifi maninazafi? Hifi tamagra'a tamaguafina refko huta nonkazafi, Jisas Kraisi'a tamaguafina mni'neana, Agrira keta antahita nosaze.

⁶Hianagi nagrama namentintima huana, tagratia rehezampintira evunoramune huta antahita keta hugahaze. ⁷Havi avu'ava osihogu Anumzamofontega nunamuna nehune. Hanki erizantimofonku vahe'mo'za huknare hihogura nunamuna nosune. Hianagi erizantimo'a eamara huno knarera osnianagi, tamagra fatgo tamavutmava hihogu nunamuna nehune. ⁸Na'ankure tagra tamage kemofa ha'renenteta rutagregara osunonanagi, tamage kemofonke amage antegahune. ⁹Tagra muse nehune, na'ankure tagrira hankavetia omne'neanagi, tamagrira hanavetmia me'negu, tamazeri knare zantfa haniegu nunamuna hunermantone. ¹⁰Na'ankure tamagri'enena omani'noanagi, ama agafare avona krenetamuanki'na, nagrama tamagranema manisuna knazana ontaminaku nehue. Ramo'ma himamuma nami'nea hanavereti, tamazeri haviza hunakura nosuanki, tamazeri hanavetisugeta hagetma tamentintifina marerisazegu nehue.

¹¹Hagi nafu nagnaheta huvhare nanekea anage hu'na kreneramue, muse nehuta, mago'ane tamamentintifina hanavenetita, ozeri hanaveti azeri hanaveti nehuta, magoke antahintahi enerita, tamarimpa fru nehinkeno, avesinte zamofone, Anumzamofa rimpa fruzamo'a tamagranega megahie. ¹²Mago magomofona avataginka azeri fru huo. ¹³Miko Anumzamofa nagamo'za musenke atreramantaze.

¹⁴Hagi Ramofo Jisas Kraisi asunku zamo'ene Anumzamofa avesi zamo'ene Avamumo'enema tagroteno mni' avu'avazamo'a mikomotmafi mesie.